

Enam empangan tunjuk paras positif

Shah Alam: Kapasiti enam dari-pada tujuh empangan di Selangor menunjukkan peningkatan kecil berbanding minggu lalu hasil daripada operasi pembenihan awan oleh kerajaan negeri melalui Lembaga Urus Air Selangor (LUAS) dengan kerjasama Jabatan Meteorologi serta hujan semula jadi.

Exco Belia dan Sukan, Infrastruktur dan Kemudahan Awam Dr Ahmad Yunus Hairi berkata, peningkatan antara 0.76 hingga 2.88 peratus itu disebabkan kadar hujan yang banyak diterima di sekitar hilir kawasan tadahan serta di bandar, bukannya di empangan.

“Bagaimanapun, kadar hujan yang banyak di kawasan hilir ini membantu pengurangan kadar pelepasan air empangan ekor paras air sungai yang mencukupi untuk keperluan loji pembersihan air (LPA).

“Justeru, kelonggaran catuan air boleh dilakukan apabila aliran air sungai tinggi, LPA boleh mengabstrak dan merawat air sungai itu dan disalurkan kepada lebih ramai pengguna,” katanya ketika sidang media di sini, semalam.

Ahmad Yunus berkata, kerajaan negeri sudah memulakan kerja mengepam air dari lombong lama untuk dialirkan ke Sungai Selangor

sejak bulan lalu.

“Secara keseluruhannya, terdapat sembilan lombong lama di negeri ini tetapi kerajaan negeri hanya menggunakan kolam Hang Tuah di Bestari Jaya untuk mengepam air ke dalam empangan Sungai Selangor buat masa sekarang.

“Empat pam dengan kapasiti 50 juta liter sehari (JLH) setiap satu digunakan untuk mengepam air ke dalam empangan.

Esok (hari ini) kerajaan negeri akan menerima lima lagi pam yang akan membantu usaha kami meningkatkan paras air di empangan Sungai Selangor,” katanya.